

自去。設有恐難。但稱我名。當護汝等。爾時商人。聞是語已。進引入海。大獲珍寶。還欲來歸。道逢羅刹黑風諸難。爾時商人。咸共一心。稱仙人名。即往救護。脫諸厄難。佛告諸比丘。欲知爾時彼仙人者。則我身是。彼時五百商人者。今五百比丘是。我於彼時。未斷煩惱。尚能拔濟彼諸厄難。況於今者。得出三界。而當不能化度彼也。爾時諸比丘。聞佛所說。歡喜奉行。

八二、須曼花衣隨身產緣

佛在舍衛國祇樹給孤獨園。時彼城中。有一長者。財寶無量。不可稱計。選擇高門。娉以為婦。種種音樂。以娛樂之。足滿十月。產一男兒。端正殊妙。須曼花衣。與身俱生。召諸相師。占相此兒。相師睹已。此兒產時。有何瑞相。父母答言。有須曼花衣。裹身而生。因為立字。名須曼那。體性賢柔。慈心孝順。年漸長大。衣亦隨大。父母愛念。便將小兒。與阿那律。令作沙彌。教使坐禪。未久之間。得阿羅漢果。三明六通。具八解脫。諸天世人。所見敬仰。時阿那

律。敕沙彌言。汝今可往。拔提河邊。取淨水來。尋往彼河。盛滿瓶水。擲虛空中。隨後飛來。時諸比丘。見是沙彌。歎未曾有。白佛言。世尊。今此須曼那沙彌。宿殖何福。生巨富家。須曼那衣。隨身俱生。出家未久。獲阿羅漢果。爾時世尊。告諸比丘。汝等善聽。吾當為汝分別解說。乃往過去九十一劫。波羅捺國。有佛出世。號毘婆尸。教化周訖。遷神涅槃。時有國王。名梵摩達多。收其舍利。造四寶塔。而供養之。時有童子。見彼塔故。心生欣樂。即便出家。年至老耄。空無所獲。深自剋責。買須曼花。持縷貫之。遍覆塔上。發願而去。緣是功德。九十一劫。不墮地獄。畜生餓鬼。天上人中。常有須曼花衣。與身俱生。受天快樂。乃至今者。遭值於我。出家得道。爾時諸比丘。聞佛所說。歡喜奉行。

八三、寶手比丘緣

佛在舍衛國祇樹給孤獨園。時彼城中。有一長者。財寶無量。選擇族望。娉以為婦。作倡伎樂。以娛樂之。其婦懷妊。足滿十月。產一男兒。端正殊妙。世所希有。其兩手中。有金錢。